

ग्राई जीवन दे ओह् दिन

—सत्यपाल शास्त्री

अस अपने ग्रां बिचें बारें हुण बी जन्दे रौह् ने आं ते केई बारीं
बर्षी दिएं छुट्टिएं च म्हीना दौं म्हीने बी कट्टी औन्ने आं पर साढ़े
बचपुने दे ग्रां ते हूने दे ग्रां च बड़ा फर्क आई गेदा ऐ। हून उत्थें ओ
भोला पन, ममता, प्यार ते निश्छलता नई रेदी ऐ जेड़ी साढ़े बचपुने
दे बमाने बिच होन्दी ही। हून उत्थें बी भौतक बाद दे फिनगर ने
अपना जैह् उगलना शुरू करी दित्ते दा ऐ। जिस कन्ने आ पवित्र
बतावरण श्री दूषत होई गेदा ऐ ते दिनो-दिन होर बी मता होन्दा
जा करदा ऐ।

मिगी याद ऐ जिसलें में छैं-सत्तें बरें दा हा तां उत्थें धर्म निर-
पेक्षता (Secularism) दा राज हा, प्यार ते महबबत दी देवी दा
उत्थें वास हा, भोला पन उत्थों दे लोकें दा गैह् ना हा ते छल-कपट
दे घोखा फरेब नां दे दूषण कुतै तुप्पे दे बी नई हें लबदे।

साढ़े ग्रां च कोई सौ घर न । इन्दे च कोई त्रीह, घर मुसलमानें
 दे ते 15 घर हरिजनें दे न ते बाकी होरनी जातीं दे । मुसलमाने दा
 मुख धन्दा ते करसानी ऐ पर तेल पीड़ना ते कपड़ा बुनने दा व्यवसाय
 बी कन्नी-कन्न चलदा ऐ । ग्रां दे बाकी लोकें कन्ने उन्दा बरतन ते
 साञ्ज-सवाञ्ज मती छल ही । हिन्दुएं दे घर जागते जा कुड़िएं दे
 ब्याह पर ओह्, धाम^१ दिन्दे होन्दे हे पर ओह अपने हिन्दु भराएं दी
 धार्मक भावना दी कदर करदे होए धाम तारिए नई बल्के खुश्क यनी
 आटा, तेल, गुड़ दी शकला च दिन्दे हे ते कन्ने बर्तन दे मतावक
 कलीरा ते कपड़े बगैरा बी । इसदे स्वा घर कोठा बनाने च; हल्ल
 बुआह्ने च, बाह्डी कराने च बी दौएं कौमां इक दुए दी मदद कर-
 दियां हां । इस चाली दौएं कौमां इक दुए दे मते कोल हियां ते दौनी
 दा आपू बिचें खासा प्यार ते बर्तन बुआहड़ा हा ।

हरिजनें दा बी आम धन्दा करसानो गै ऐ पर इन्दे बिच मेधें
 दे स्वा म्हाशे बांस दे पनखरे, टोकरियां, छाबड़ियां बगैरा बनान्दे
 न, सरैरे मरे दे पशुएं दा चम्म तुआरदे न. चमैर नुक्कां बनान्दे
 न, रटाल छज्ज-छानणिआं त्यार करदे न । इयां गे घमार मिट्टी दे
 भाण्डे घड़दे न, तरखान ते लुहार क्रमशः घर कोठे ते हल्लीं जुंगले
 बनान्दे ते दराट-दराटियां ते रंबे बगैरा घड़दे न ।

उज्ज घाटी दा प्रमुख ग्रां होने कन्ने इत्थुआं दी जमीन खरी
 उपजाउ ऐ । ग्रां च जगा जगा बौल्लियां ते तला न ते कुतै कुतै खूह्

1. तारोआं भठोरे जां घ्यूरें दा परोसा ।

हैन । फलें च सब थमां मते अम्ब होन्दे न ते दुए दर्जे पर मरूद, केले,
 लगाठ, नाख, चगोत्रे, मिट्ठू, आरू, कक्कड़ो, खीरा बगैरा न । स्पाइ
 होने आले ते जंगली फलें च त्रिम्बल, फुकाड़े, ठल्ले, जामनू, कैथ,
 फौ (फालसे), आखरे, ककोए, बैर ते गह्, रने ग्राम होन्दे न । आखरें
 दिआ ब्होरा च आखरें दो खूब मौज होन्दी ऐ । एह् मोसम बड़ा गै
 पुहाना होन्दा ऐ ।

आखरें दी ब्हारा दी महत्ता दे कारण गै इस लाके च इस
 ब्हारा च बोलने आले पक्खरू दी बोली दा अर्थ इयां कित्ता जन्दा
 ऐ — 'आखरे पक्के मै तीं चक्खे, पिआके भेजो ।'

भाएं इस पक्खरू दा इयां बोलने दा अपना ढंग ऐ पर लोकें
 पपनी भावना दे मतावक इसदा अर्थ इस चाली करी लेदा ऐ ।

साढ़े ग्रां च कनक, मक्की, तिल, माह्, कुलथ, रोडू, धान,
 रौंगी, रौंग, रौंगू, कपाह्, सियूल, गन्ना, अलसी, सरैआं ते मुंगी दी
 पीदावार ग्राम होन्दी ऐ । सब्जिएं बिच घिआ कद्दू, भिण्डी, मूली,
 मोगलू, राजमाह. मर्चा, जम्बोरू, जम्बीरो, गरगल, लुसाड़े, अदरक,
 मरेले, प्याज, भट्ठे, शोम, टींडे, पालक, कुल्फा, दुहाने, घिओ-
 पनोलां ते जिमोकन्द आम होन्दिआं न । उआं कड़म, गोभी ते
 प्पाटर बी कुतै-कुतै हाई जन्दे न । जंगली साग-सब्जियें च ककोड़े,
 चनेरी, भिञ्जनी, इट्ट-सिट्ट, छतड़ियां, ग्वाल मण्डे, बोगल भत्त,
 पुआह्, तड़ियां, ढींगरिआं, तरड़, नाड़े ते सादू आम होन्दे न ।

सर्दिएं दे दिनें च गुज्जर, बकरवाल ते गद्दी प्हाड़ा दा थल्लै

ढली श्रौन्दे न ते ग्रां च ते ग्रां दे आसे-पासे डेरे लाई लैन्दे न । अदू
अस जागत गुज्जरें ते बकरवालें कोला मते डरदे होन्दे हे । डरे दा
कारण जैदे तर उन्दी लम्भो ते डरौनी दाढो ते लवास गै होन्दा ऐ ।
कदें-कदें पशौरे पासेआ पठान बो साढ़े ग्रां च आइयै हिङ्ग ते जोरा
बेचदे होन्दे हे । ओहू लोकेँ गो एहू चीजां दुहूरिआं बी देई जन्दे
होन्दे हे ते दुए साल आनियै अपने पैसे गराई लैदे होन्दे हे ।

ब्याहू-शादिणं पर भीर दुए ग्रां दा औन्दे न । फसल होने पर
बोजरू करसाने गी ग्रैहू-गोचर वस्सियै दाने लेई जन्दे न । इयां गै
कालिए ब्राह्मण सूईआं बेचन औन्दे न ते कन्ने भिकव बो मंगदे न ।
करसाने दी फसल होने पर लुहार, तखान, नाई, पन्त बगैरा बी
बरसोदीं लैन औन्दे न ते शाहू लोक अपनी गराई करन । अज्ज श्रौं
सोचनां जे करसान सचमुच गै अन्नदाता ऐ ।

ग्रां च म्हाजने दी उसलै इक्कै दकान ही जिसदे च मिठाई दे
स्वा सारा सौदा होन्दा हा । लुहाईएँ दी इत्थे कोई बी दकान नई
ही । ग्रां च इक घर चाजिएँ दा बी ऐ ते पण्डतें दे कोई चार घर
होन्दे हे । पणतें चा केई पण्डत्याई दे कन्ने वैदक, शौकारी ते जिमी-
दारी दा कम्म करदे हे । मेरै ताया जी ग्रां च जमोना दी देखभाल
शौकारी दे स्वा ग्रां च नेता-गिरी बो करदे होन्दे हे ते मेरे पिता हो
वैदक, पण्डत्याई ते शौकारी । हून ओ जिमी दी देखभाल बी कर
न । साढ़ी जमीन मुजारे गै बाहून्दे-राहून्दे न । अदू शौकारी
जिमीदारी कोला साढ़े घर बड़ा नाज जमा होन्दा हा । कदें-कदें
लोकेँ दे घर बी दाने दियां पण्डी भरनियां पेई जन्दियां हां । अस ज्या

दाने दे डेरें पर खूब नचदे होन्दे हे । साढ़े ताया ते पिता होर ते ग्रां दे
दुए शौकार लोकेँ गो दाने बत्तर¹ ते चपंजे' पर दिन्दे हे । दानें दा
सारा स्हाब-किताब डोगरे अक्खरें च लिखेआ जंदा हा । ए परम्परा
हुन बी चला करदी ए । असल च डोगरी भाष दे वास्तविक (भाषा
ते लिपो) दे संरक्षक इयं लोक न ।

अस ग्रां च नेकां किस्में दियां खेडां खेडदे हे, जियां इट्टी-डण्डा,
गुली-डण्डा, कौडी, कुश्ती, छप-छपूनी, राजा-रानी बनना, लाड़ी-
मराजे दी खेड, सपाइयें दी खेड, चोर ते पुलस, पंजगीटड़े, घ्राट
चलाने बगैरा । इन्दे चा केइयें खेडें च साढ़े क नै कुडियां बी शामिल
होन्दिआं हां । इस छूत-छात दा परहेज करने आले जमाने बिच बी
अस सारिएँ जातीं दे जागत जात-पात दे भेद भुलियै बड़े प्यार
महबबती कन्ने किट्ठे रलियै खेडदे होन्दे हे । खाने-पीने आलिआ
चीजां बी किट्ठे बेइयै खन्दे-पीन्दे हे । साढ़े सुतन्न प्यार दे अमृत बिच
जात-पात ते उच्च-नीच दे भावें दा ते मजहबी जन्नून दा जैहर अपना
कदें बिन्द बी असर नई हा करो सकेआ ।

साढ़े घ्राट तीलें दे ते जां चोड़ें दे सिकड़ें गी घस्सियै बनाए
दे चक्करें दे होंदे हे । आट्टे दे थाहूर मिट्टी ते लेत्तर होन्दा हा ।
जदू साढ़े काम्मे गी घर कम्म होन्दा हा तां में पशु चराने गी जन्दा
गै हा बो इयां बी खेडने दे चाएं आऊं ग्वालें कन्ने चली जन्दा होन्दा

1. चार पाईयां दाने देइयै छः पाईयां लैना बत्तर ते चार देइयै पंज
पाईयां बापस लैना 'चपंज' खुआन्दा ऐ ।

हा। स्कूल दाखल होने दे परैन्त बी एह् चस्का जारी रिआ। अस घरें आलें दिआ चोरिआ ब्हारा दे मतावक घरा दा जम्बीरू, जम्ही-रिआं, छल्लिआं, आरूं, अम्ब, आमकड़िआं ते लूण मर्चा लेई जन्दे होन्दे हे ते बने च जाइयै कुतै पानियै दे कंढै बेइयै वड़े मजे कन्ने खन्दे होन्दे हे। किन्ना स्वाद हा उनें ब्हारी मेवें च। ब्हारा दे मतावक असें गो दुए बनू ते घरू मेवे जिआं त्रिम्बल, फकाड़े, सत्तियां¹ कैन्थ, आखरे, गर्ने, फ्रौ, जामनू, ढल्ले, मरूद, मिट्ठू, चगोत्रे बगैरा बी आम खाने गो लब्बी जन्दे हे। इयां अस अपने ओह् सुनैहरी दिन म्हेशां प्रकृति देवी दिआ गोदा बिच हसदे-खेड़दे गुजारदे गे। जिसलै अस स्कूल दाखल होई गे तां बी अस अपने नियमें पब कार-बन्द रे हे। अस ग्वाल घरे दा मट्ठै जां शाई कन्ने न्हारी करियै जन्दे हे ते दपैहरी भांत-सभान्तिआं रुट्टियां जिसलै घरे दा औन्दिआं हां तां अस सारे ग्वाल कुतै पानियै दे कंढै, सैलिआ द्रबड़िआ पर बेइयै अप्पू बिचें बण्डी-बण्डी खन्दे हे। असें गो उस प्रीति भोजे च जेह् डा मजा औन्दा हा ओह् कुसै बी बड़्डी कोला बड़्डी शैहरी पार्टी दे मजे कोला घट्ट नई हा होन्दा। अस किट्ठे रलियै खेड़दे, घुलदे, फुम्मनिआं डडारसां पांदे, गान्दे-बजान्दे, हसदे-हसान्दे, रोन्दे-रुआन्दे, रुसदे-रुसान्दे ते मनदे-मनीन्दे। जिस निश्छल ते भोलेपन भरे सांभे प्यार दे झूगे समुन्दरे च गोते लांदे होन्दे हे उस दियां सीर भला हून की सुक्की गईयां! समझ नई औन्दी।

अदू अस ग्वाल किट्ठे होइयै नेकां तरां दे गीत गान्दे हो

1. चीड़ा दे भिड़ू (चढाठू) दे बिच नेजे आला लेखा होने आले बी

हे। अज बी ग्रां गेदा में जिसलै उनें थारें चा निकलना तां—

“सैलियां धारां पौन फुहारां गोरी दा मन डोली बो गिआ।”

“मनसो मेरिये जिन्दे चढ़ी असें प्हाड़े गी जाना जाना बो।”

“सागर दिन्दा भलारे रांझा, सागर कियां टप्पना।”

“रांझा जोगी बनेआ कन्ने मुन्दरां पाईयां,

इनें मुन्दरें जोग कमाया सेईओ।”

बगैरा गीतें दिआं पंक्तियां मेरिआ जीभा पर गुण-गणान लगी पौदिआं न। अज औं सोचना किन्ना चंगा ते सोह्ना हा ओह् ग्रां दा बचपुना। गौहरी तड़क-भड़क भरे बनीटो वातावरण च पलेटे दे बच्चें आस्तै एह् जीवन किन्ना दुर्लभ ऐ। पैसे आले लोक भाए ज्हारां रपे बी खर्चियै गर्मिएं दे दिनें च अपने बच्चें गो ठण्डियें जगें लेई जन्दे न पर ओ बच्चे फिरो बी इन्ना नन्द प्राप्त करी सकदे होडण? मेद नई पौन्दी।

ग्रां च जिसलै मक्की दी गोड़्डी होन्दी, शेपां¹ होन्दिआं, ल्हेर लगदे, ओर लगदे, घलाईआं लगदिआं, बहरैलीं बुड़्दिआं, उटेर लगदे, बाह् डियां होन्दिआं, गाह गोह्न्दे, पुनाई होन्दी तां ग्रां च चारै पास्सै जिह् डी रौनक होन्दी उसदा वर्णन इत्थें बस्तार दे डर कन्ने करना मुस्कल ऐ उआं इस बारे च इन्ना जरूर आखने पौग जे सरकार सहकारी खेती दिआं जेह् डिआं योजनां बना करदी ऐ जां जेह् डे तजरबे करा करदी ऐ ओह् साड़े ग्राए च पैंह्लें गै युगें-युगें थमां प्रचलत न।

1. धाने दी बिजाई।